

Uunga siunnersuut:**Nappaatit tunillaassortut akiorniarlugit iliuitsit pillugit Inatsisartut inatsisaat****Kapitali 1***Atuuffia*

§ 1. Nappaatit § 2-mi taaneqartut nunami maani nungusarnerisigut imaluunniit pinaveersaartinnerisigut, siaruarnissaasa eqqunneqarnissaasaluunniit pinngitsoortinnerisigut, siaruatsaalinerisigut killilersimaarnerisigullu inuiaqatigiinnik inunnillu ataasiakkaanik illersuinissaq siunertaralugu iliuusissat Inatsisartut inatsisaanni taaneqartut aallartinneqarsinnaapput.

§ 2. Inatsisartut inatsisaanni nappaatit tuniluuttartut, nappaatit inunnut nalinginnaasumik ulorianartut nappaatillu inuiaqatigiinnut aarlerinartorsiortitsisut pineqarput.

Imm. 2. Nappaat tuniluuttartoq tassaavoq nappaat imaluunniit peqqissutsikkut atugarisaq, tappiorannartunit nappaateqalersitsisartuniillu allanit, inunnit, inunnut imaluunniit inuit akornanni tunillaassuussinnaasumit pilersartoq.

Imm. 3. Nappaat inunnut nalinginnaasumik ulorianartuq tassaavoq nappaat tuniluuttartoq, annertunerusumik tunillaassuussinnaasoq, annertuumik toqquataasartoq, ulorianartumik ataavartumilluunniit ajoqusiisinnaasoq aammalu:

- 1) katsorsaaneramik, napparsimalluni takkutinngitsoornermik imaluunniit piffissami sivirusunerusumi piginnaangorsaaneramik kinguneqarsinnaasoq,
- 2) inuit peqqissusaannut annertuumik ulorianartorsiortitsisumik siaruarujussuarsinnaasoq, imaluunniit
- 3) sunniuteqarluartumik pinaveersaartitsisoqannginnera katsorsaasoqannginneraluunniit pissutigalugu annertuumik kingunerlutsitsisinnaasoq.

Imm. 4. Nappaat inuiaqatigiinnut aarlerinartorsiortitsisoq tassaavoq nappaat inunnut nalinginnaasumik ulorianartuq, siaruarnermigut inuiaqatigiinni pingaaruteqarluinnartunut sakkortuumik ajoqusiisinnaasoq imaluunniit ajoquseeratarsinnaasoq.

Imm. 5. Naalakkersuisut Nunatta Nakorsaaneqarfianit inassuteqartoqareerneratigut imm. 2-mi aamma 3-mi nappaatit sorliit pineqarnersut pillugit malittarisassanik erseqqinnerusunik aalajangersaassapput.

Imm. 6. Naalakkersuisut Tunillaassortunik Nappaalanersuaqarneranut Ataatsimiititaliarsuaq siunersieqatigereerlugu, imm. 4-mi nappaatit sorliit pineqarnersut pillugit malittarisassanik erseqqinnerusunik aalajangersaassapput.

Imm. 7. Kinguaassiutitigut nappaatit Inatsisartut inatsisaanni ilaatinneqanngillat.

Imm. 8. Naalakkersuisut tunillaassortumik nappaalasoqalernerani atuarfiit paaqqinnittarfiillu atugaat pillugit malittarisassat aalajangersarneqarsinnaapput, atuarfinni suliffeqarfinnilu tunillaassuuttussatut immikkut aarlerinaatilinnut aamma atuutsinneqalersinnaallutik.

Kapitali 2

Nappaatit inuiaqatigiinnut aarlerinartorsiortitsisut siammarnissaannut pinaveersaartitsilluni suliniutinut iliuutsinullu akisussaaffik

Tunillaassortunik nappaalanersuaqarneranut ataatsimiititaliarsuaq

§ 3. Naalackersuisut Tunillaassortunik Nappaalanersuaqarneranut Ataatsimiititaliarsuarmik, nammineq ingerlatsinermigut imaluunniit Naalackersuisunit qinnuigineqarnermigut nappaatip inunnut nalinginnaasumik ulorianartup, iliuuseqarfigineqannginnermigut nappaatit inuiaqatigiinnut aarlerinartorsiortitsisut ineriartorsinnaasutut ilimagineqartup iliuuseqarfigineqarnissaa aamma nappaatip inuiaqatigiinnut aarlerinartorsiortitsisup iliuuseqarfiginissaa pillugit ataqatigiissumik siunnersuisussamik pilersitsissapput. Tunillaassortunik Nappaalanersuaqarneranut Ataatsimiititaliarsuup matumani Naalackersuisut inatsit manna naapertorlugu malittarisassanik aalajangersaassasut imaluunniit malittarisassanik aalajangersarneqareernikunik allanngortitsissasut atuukkunnaarsitsissasulluunniit inassuteqarfigisinnaavai.

Imm. 2. Tunillaassortunik Nappaalanersuaqarneranut Ataatsimiititaliarsuaq pisariaqartitsineq naapertorlugu katersuuttassaaq. Tunillaassortunik Nappaalanersuaqarneranut Ataatsimiititaliarsuaq tamatuma saniatigut ukiumut ataasiarluni ataatsimiittarpoq.

Imm. 3. Tunillaassortunik Nappaalanersuaqarneranut Ataatsimiititaliarsuarmi uku ilaapput:

- 1) Nunatta nakorsaanera,
- 2) Naalackersuisut Siulittaasuata Naalackersuisoqarfianit naalackersuisoqarfimmi pisortaq, peqqissutsimut, inuussutissarsiornermut, attaveqaatersuutinut, ilinniartitaanermut ulluuneranilu paaqqinnittarfimmut kiisalu aningaasaqarnermut naalackersuisoqarfimmi pisortat,
- 3) Politiit pisortaat,
- 4) peqqinnissaqarfimmi pisortaq, kiisalu
- 5) ilaasortaq ataaseq , kommuninit ataatsimut toqqarneqartoq.

Imm. 4. Kommunit kina ilaasortassatut innersuussutigissanerlugu isumaqatigiissutigisinnaangikkunikku kommunit tamarmik immikkut inummik 1-imik Tunillaassortunik Nappaalanersuaqarneranut Ataatsimiititaliarsuarmut innersuussisinnaapput. Naalackersuisut tamatuma kingorna kommunit ilaasortassatut innersuussutigisaasa akornanni ataatsimik toqqaassapput.

Imm. 5. Kommunit sinnerlugit ilaasortaasoq kommunalbestyrelsimut ilaasortaaqqusaanngilaq.

Imm. 6. Tunillaassortunik Nappaalanersuaqarneranut Ataatsimiititaliarsuarmi ilaasortaq peqataasinnaangikkuni ilaasortaq sinniisuminik peqataatitaqarsinnaavoq.

Imm. 7. Tunillaassortunik Nappaalanersuaqarneranut Ataatsimiititaliarsuaq ataatsimiinnernut peqataasussanik oqartussaneersunik allanik attuumassutilinnik qaaqqusisinnaavoq.

Imm. 8. Peqqissutsimut Naalakkersuisoqarfimmi naalakkersuisoqarfiup pisortaa Tunillaassortunik Nappaalanersuaqarneranut Ataatsimiititaliarsuarmi siulittaasuvoq Tunillaassortunillu Nappaalanersuaqarneranut Ataatsimiititaliarsuarmut allattoqarfimmik pilersitsinissamik isumaginnittuussalluni.

Imm. 9. Nunatta Nakorsaaneqarfianit nappaatip siaruannerata ineriartornera il.il. pillugit paasissutissat kiisalu peqqissutsikkut ilisimasat tunngavigalugit tamatumangga nalilersuinerit Naalakkersuisunut siunnersuinnermut inassuteqarnermullu tunngavinni takuneqarsinnaassapput.

Imm. 10. Naalakkersuisut suleriaatsimut Nappaalanersuaqarneranut Ataatsimiititaliarsuup sulineranut malittarisassanik erseqqinnerusunik aalajangersaasinnaapput.

§ 4. Pisortani oqartussat Nunatta Nakorsaaneqarfia oqartussallu allat, Inatsisartut inatsisaat manna malillugu suliassanik tullinnguuttunik isumaginnittut ikiussallugit pisussaaffigaat:
1) pisussaataaffiit piginnaatitaaffiillu Nunatta Nakorsaaneqarfianut oqartussanullu allanut Inatsisartut inatsisaat manna malillugu tunniunneqarsimasut isumagissallugit, aamma
2) iliuusissat Nunatta Nakorsaaneqarfianut oqartussanullu allanut Inatsisartut inatsisaat manna malillugu tunniunneqarsimasut naammassissallugit.

Imm. 2. Suleqatigiiffiit namminersortut, ingerlatseqatigiiffiit inatsisitigullu pisinnaatitaasut pisussaataitaasullu allat pisuni immikkut ittuni Naalakkersuisut erseqqinnerusumik aalajangersagaat malillugu oqartussaasut suliassanik isumaginninnerannik ikiorsinnaavaat, Inatsisartullu inatsisaat manna naapertorlugu pisussaaffilerneqarsinnaallutik.

§ 5. Kommunalbestyrelsit nappaatit inunnut nalinginnaasumik ulorianartut inuiaqatigiinnulluunniit aarlerinartorsiortitsisut siaruarnissaannik pinaveersaartitsiniarlutik siaruanginnissaallu qulakkeerniarlugu iliuuseqassapput, tassunga ilanngullugu nappaatit taakku iliuuseqarfiginissaannut pilersarusiussapput, aamma Nakorsaaneqarfiup oqartussallu allat iliuutsinik Inatsisartut inatsisaat naapertorlugu aalajangersarneqartunik imaluunniit matumani pineqartut naapertorlugit aalajangersarneqartunik suliaqarnerannik ikiussallugit.

§ 6 Kommunalbestyrelsi malittarisassat imm. 2 naapertorlugu aalajangersarneqartut malillugit innuttaasunik, tunillatsissimasutut uppernarsarneqarsimasunik allallu peqqissusaat eqqarsaatigalugit inissiivimmi taama ittumi mattusimaneqarnissamut kajumissuseqartunut inissiivinnik atugassiissaaq.

Imm. 2. Naalakkersuisut kommunalbestyrelsip imm. 1 malillugu akisussaaffii pillugit, tassunga ilanngullugit mattusimavinnik atugassiinissaaq aamma mattusimavinnut innersuussisarnermut piunasaqaatit pillugit malittarisassanik erseqqinnerusunik aalajangersaassapput.

Kapitali 3

Inunnut ataasiakkaanut aamma inunnut ataasiakkaanut eqimattakkaanut iliuutsit

Piunasaqaatit nalinginnaasut

§ 7. Kapitali manna malillugu iliuseqarnerit tamarmik pisariaqartuussapput, sapinngisamik sivikitsuussapput iliuitsimillu siunertamut tunngatillugu naleqquttuussallutik.

Iliuserineqartoq akuliuffiunnginnerpaaq qajassuussinerpaarlut atorineqassaaq, tamanna siunertarineqartup anguniarnissaanut naammassappat.

Imm. 2. Iliuitsip attanneqarnissaa pisariaqarunnaarpat iliuitsit atorunnaarsinneqassapput.

§ 8. Nappaatit inunnut nalinginnaasumik ulorianartut imaluunniit inuiaqatigiinnut aarlerinartorsiortitsisut pinaveersaartinniarlugit, siaruatsaaliorniarlugit piioneerutsinniarlugilluunniit §§ 9 aamma 10, § 11 imm.1, § 12 imm.1 aamma § 13, imm 1 aamma 2 malillugit peqqussutit inunnut ataasiakkaanut atuutilersinneqarsinnaapput, taamaattorli imm. 5 takuuk.

Imm. 2. Nunatta Nakorsaaneqarfiata imm. 1-imi aalajangersakkat eqqaaneqartut malillugit peqqussuteqartoqannginnerani inuk iliuseqarfigneqartussatut eqqarsaatigineqartoq iliuseqarnerup naammassinissaanut suleqataanissaanik piumaffigissavaa.

Imm. 3. Inuk iliuseqarfigneqartussatut eqqarsaatigineqartoq paaqqinnittarfimmi, katsorsaavimmi assigisaaniluunniit najugaqarpat najugaqarallarpalluunniit, suleqataanissaanik kajumissaarneqarnerata nalunaarutiginnissaanut tunngatillugu Nunatta Nakorsaaneqarfiata paaqqinnittarfik, katsorsaavik assigisaalluunniit qulakkeerinnissasoq piumaffigissavaa. Suliffeqarfimmi, katsorsaavimmi assigisaaniluunniit pineqartumi nammineq piumassaseq naapetorlugu peqataanissamut kaammattuut malinneqanngippat Nunatta Nakorsaaneqarfia tamatuminnga piaarnerpaamik ilisimatinneqassaaq.

Imm. 4. Nunatta Nakorsaaneqarfiata imm. 1-imi aalajangersakkat eqqaaneqartut malillugit peqqussummik nalunaaruteqartoqarneranut atatillugu peqqussutip nalunaarutigineqartup naammassineqarnissaanik paaqqinnittarfik, katsorsaavik assigisaalluunniit qulakkeerinnissasoq piumaffigissavaa.

Imm. 5. Nappaatit inunnut nalinginnaasumik ulorianartup inuiaqatigiinnuunniit aarlerinartorsiortitsisup pinaveersaartinneqarnissaa siaruatsaalineqarnissaalu pisariaqalerpat, Nunatta Nakorsaaneqarfianit inassuteqartoqarneratigut Naalakkersuisut inunnut ataasiakkaanut eqimattakkaanut, nappaammik inunnut nalinginnaasumik ulorianartumik inuiaqatigiinnuunniit aarlerinartorsiortitsisumik napparsimasunut imaluunniit nappaammik taama ittumik tunillatsissimasorisanut imm. 1 malillugu iliuitsinik aallartitsinissaq pillugu malittarisassanik aalajangersaasinnaapput.

Misissortinnissamut

§ 9. Nappaatit inunnut nalinginnaasumik ulorianartut inuiaqatigiinnuunniit aarlerinartorsiortitsisut pinaveersaartinneqarnissaat, siaruatsaalineqarnissaat piioneerutsinneqarnissaalluunniit siunertaralugu Nunatta Nakorsaaneqarfiata inuit, nappaammik inunnut nalinginnaasumik ulorianartumik inuiaqatigiinnuunniit aarlerinartorsiortitsisumik napparsimasut imaluunniit nappaammik taama ittumik

tunillatsissimasorisat peqqissaanermik suliaqartumit misissortinnissaannik piunaffigisinnaavai.

Napparsimavimmut unitsinneqarnissamut

§ 10. Nunatta Nakorsaaneqarfia piffissami aalajangersimasumi inuit nappaammik inunnt nalinginnaasumik ulorianartumik inuiaqatigiinnulluunniit aarlerinartorsiortitsisumik napparsimasut imaluunniit nappaammik taama ittumik tunillatsissimasorisat napparsimavimmut inissiivimmulluunniit allamut naleqquttumut, matumani § 9 malillugu misissortinnissaannut imaluunniit § 13 malillugu eqqiarneqarnissaannut atatillugu pisariaqarpat unitsinneqarnissaannik peqqusinnaavai.

Imm. 2. Imm. 1 naapertorlugu peqqussut sapaatit akunnerini amerlanerpaamik 4-ni atuuttussanngortinneqarsinnaavoq. Peqqussut tamatuma kingorna sivilunerpaamik sapaatit akunnerinik 4-nik sivitsorneqarsinnaassaaq.

Mattusimaneq

§ 11. Nakorsaaneqarfiup kinaluunniit nappaammik inunnt nalinginnaasumik ulorianartumik inuiaqatigiinnulluunniit aarlerinartorsiortitsisumik napparsimasoq imaluunniit nappaammik taama ittumik tunillatsissimasorisat inissiivimmi naleqquttumi piffissami aalajangersimasumi mattusimanissaannik peqqusinnaavaa.

Imm. 2. Peqqussut sapaatit akunnerini amerlanerpaamik 4-ni atuuttussanngortinneqarsinnaavoq. Peqqussut tamatuma kingorna sivilunerpaamik sapaatit akunnerinik 4-nik sivitsorneqarsinnaassaaq.

Katsorsaaneq

§ 12. Nakorsaaneqarfiup kinaluunniit nappaammik inunnt nalinginnaasumik ulorianartumik inuiaqatigiinnulluunniit aarlerinartorsiortitsisumik napparsimasoq imaluunniit nappaammik taama ittumik tunillatsissimasorisat, taassuma mattusimaneq nappaatip siaruarnissaanut pinaveersaartitsinermut siaruatsaaliinermulluunniit naammangippat piffissami aalajangersimasumi peqqissaanermik suliaqartumit misissortinnissaannik piunaffigisinnaavaa.

Imm. 2. Imm. 1 naapertorlugu peqqussut sapaatit akunnerini amerlanerpaamik 4-ni atuuttussanngortinneqarsinnaavoq. Peqqussut tamatuma kingorna sivilunerpaamik sapaatit akunnerinik 4-nik sivitsorneqarsinnaassaaq.

Eqqiaanissamut tunillaannartuiaanissamullu

§ 13. Nunatta Nakorsaaneqarfia tunillatsissimasunik imaluunniit tunillaassortumik timimiulinnik taakkunungaluunniit attaveqarsimasunik, tunillannartunik

mingutsinneqarsimasunik mingutsinneqarsimasorineqartunilluunniit eqqiaanermik aallartitsisoqarnissaanik peqqusisinnaavoq.

Imm. 2. Nakorsaaneqarfiup taamatuttaaq tunillannartut siaruarnissaat pinaveersaartinniarlugu inuit tunillannartumik mingutsinneqarsimasorineqartut tunillannartumut misissortinnissaannik, illersuutinik assigisaannilluunniit atuinissaannik peqqusinnaavai.

Imm. 3. Naalakkersuisut Nunatta Nakorsaaneqarfia siunnersueqatigereerlugu inunnik eqqiaanissamut aamma misissortinnissamut, illersuutinut assigisaannulluunniit malittarisassanik erseqqinnerusunik aalajangersaasinnaapput.

§ 14. Nunatta Nakorsaaneqarfia angallassissutinik allanillu aalaakkaasuunngitsunik kiisalu aalaakkaasunik il.il. tunillannartuiaanissamik peqqusisinnaavoq.

Imm. 2. Naalakkersuisut Nunatta Nakorsaaneqarfia siunnersueqatigereerlugu tunillannartuiaanermut malittarisassanik erseqqinnerusunik aalajangersaasinnaapput.

Tamanut angallassissutit

§ 15. Nunatta Nakorsaaneqarfia inuit nappaammik inunnt nalinginnaasumik ulorianartumik inuiaqatigiinnulluunniit aarlerinartorsiorititsisumik napparsimasut imaluunniit nappaammik taama ittumik tunillatsissimasorisat tamanut angallassissutinik piffissami erseqqinnerusunik aalajangersarneqartumi atuinissaannik inerteqquteqarsinnaavoq.

Imm. 2. Imm. 1 malillugu inerteqqut ullut arfineq-marluk tungaannut atuuttussatut nalunaarutigineqassaaq. Inerteqquteqarsinnaanermut piumasaqaatit suli eqqortinneqarpata piffissaq sivitsorneqarsinnaavoq.

Iliuutsit naammassinissaat siunertaralugu pissaanermik atuineq

§ 16. Nunatta Nakorsaaneqarfia paaqqinnittarfimmit, katsorsaavimmit assigisaanniilluunniit Nakorsaaneqarfiup § 8, imm. 4 malillugu §§ 9, 10, 11 aamma 13, imm 1 aamma 2 malillugit iliuuseqaaqquusimasaannit qinnuiginnittoqarneratigit iliuuserineqartup taama ittip naammassinissaa attannissaalu siunertaralugit inummut iliuuseqarfigineqartussamut pissaanermik tullinnguuttutut ittumik atuisoqarsinnaasoq aalajangersinnaavoq:

- 1) Pineqartumik timikkut aalaakkiineq, uninngatitsineq utertitsinerlu.
- 2) Pineqartup sumiiffigisaani ininik parnaarsuineq.

Imm. 2. Ininik pineqartup sumiiffigisaanik parnaarsinermi pineqartup iniminngaanniit ikioqqusinnaanissaa qulakkeerineqassaaq. Tamatuma saniatigit pineqartoq akuttunngitsumik, sivikinnerpaamik akunnermut ataasiarluni sulisunit takusarneqartassaaq.

Imm. 3. Imm. 1, nr. 1 aamma 2 malillugit pissaanermik atuineq aamma imm. 2-mi oqaaseqatigiit aappaat naapertorlugit nakkutilliinermik nalunaarsuineq paaqqinnittarfimmut, katsorsaavimmut assigisaannulluunniit nalunaarsuiffimmut nalinginnaasumik atorneqartartumut ingerlaannartumik nalunaarsorneqassapput.

Imm. 4. Imm. 1 naapertorlugu aalajangiinerit inatsimmik allamik saneqqutsisinnaapput.

Politiit suleqataanerat

§ 17. Kapitali manna malillugu inerteqquteqarneq peqqussuteqarnerlu pillugit malittarisassat maleruarneqarnissaat qulakkeerniarlugu malittarisassat atuuttut naapertorlugit politiit pissaanermik pisarialimmik atuisinnaapput.

Kapitali 4

Inuiaqatigiinnut iliuutsit

Piumasaqaatit nalinginnaasut

§ 18. Kapitali manna malillugu iliuuseqarnerit tamarmik pisariaqartuussapput, sapinngisamik sivikitsuussapput iliuutsimillu siunertamut tunngatillugu naleqquttuussallutik. Iliuserineqartoq akuliuffiunnginnerpaaq qajassuussinerpaarlut atorineqassaaq, tamanna siunertarineqartup anguniarnissaanut naammassappat.

Imm. 2. Iliuutsip attanneqarnissaa pisariaqarunnaarpat iliuutsit atorunnaarsinneqassapput.

§ 19. Kapitali manna malillugu iliuutsit, nappaatip inuiaqatigiinnut aarlerinartorsiortitsisup siaruarnissaa pinaveersaartinniarlugu siaruatsaaliniarluguluunniit aallartinneqarsinnaapput, taamaattorli imm. 2 takuuk.

Imm. 2. Nappaat inunnut nalinginnaasumik ulorianartoq, iliuuseqarfigineqanngikkuni inuiaqatigiinnut aarlerinartumik ineriartorsinnaasutut ilimagineqartoq pinaveersaartinniarlugu siaruatsaaliniarluguluunniit §§ 23, 24, 25 aamma 26 malillugit iliuutsit aamma aallartinneqarsinnaapput.

Inuit sumiiffimmi ataatsimi arlaliunissaannik inerteqquteqarneq

§ 20. Naalackersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu inuit sumiiffimmi ataatsimi, tassunga ilanngullugu annerusumik minnerusumilluunniit katersuunnermut, aqqissuussinernut, pisussanut il.il. atatillugu arlaliunissaannik inerteqquteqarnermut nuna tamakkerlugu nunalluunniit ilaanut malittarisassanik aalajangersaasinnaapput.

Imm. 2. Malittarisassat imm. 1 naapertorlugu aalajangersarneqartut illup iluani, silami, pisortat inuillu katerittarnerannut, aqqissuussinernut pisussanut il.il. tunngasinnaapput.

Imm. 3. Malittarisassat imm. 1 naapertorlugu aalajangersarneqartut inatsimmik allamik saneqqutsisinnaapput.

Imm. 4. Imm. 1 aamma 2 eqqartuussivinnut Inatsisartunullu kiisalu katersuunnernut naalackersuinikkut allatulluunniit isummersornissamik siunertalinnut atuutinngillat.

Imm. 5. Naalackersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu malittarisassanik imm. 1 naapertorlugu aalajangersarneqartunik unioqqutitsisoqannginnissaanut nakkutilliinissaq siunertaralugu eqqartuussiviit

akuersiteqqaarnagit ininut piffinnullu allanut isersinnaanermut malittarisassanik aalajangersaasinnaapput.

Sumiiffinni aalajangersimasuniinnissamut inerteqquteqarneq

§ 21. Inuit sumiiffimmi ataatsimi ataatsimoornissaannut inerteqquteqarneq pillugu malittarisassanik § 20, imm 1 naapertorlugu aalajangersaasoqarsimappat, Naalakkersuisut malittarisassani taakkunani sumiiffiit nalinginnaasumik iserfigineqarsinnaasuni aalajangersimasumiinnissamut inerteqquteqarsinnaavoq, matumani sumiiffimmi tassani nappaammik inuiaqatigiinnut aarlerinartorsiortitsisumik tuniluttoqaratarnissaata pinaveersaartinnissaanut tamanna pisariaqartutut Nunatta Nakorsaaneqarfianit nalilerneqarpat. Oqaaseqatigiit siulliit malillugit inerteqquteqarnermi sumiiffimmi pineqartumi angallanneq nalinginnaasooq pineqanngilaq.

Imm. 2. Imm. 1 malillugu inerteqqut ullut arfineq-marluk tungaannut atuuttussatut nalunaarutigineqassaaq. Inerteqquteqarsinnaanermut piumasaqaatit sulii eqqortinneqarpata piffissaq sivitsorneqarsinnaavoq.

Inunnut amerlasuunut uppernarsarneqarsimasumik tunillaassorfiusimasumiissimasunut iliuutsit

§ 22. Naalakkersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu inuit sumiiffimmi aalajangersimasumiissimasut, katersuunnerni, aaqqissuussinerni, pisuni assigisaanniluunniit peqataasimasut, sumiiffigisimasaanni peqataaffigisimasaannilu nappaammik inuiaqatigiinnut aarlerinartorsiortitsisumik uppernarsarneqarsimasumik tunillaasoqarsimappat, peqqissaanermik suliaqartumit misissortinnissaat imaluunniit pisariaqarpat inissiivimmuut naleqquttumut mattunnissaat pillugit malittarisassanik aalajangersaasinnaapput.

Sumiiffimmik matusineq

§ 23. Naalakkersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu sumiiffinnik, nappaatip inuiaqatigiinnut aarlerinartorsiortitsisup atuuffianik, imaluunniit nappaatip taama ittup atuuffiulernissaanik eqqunneqarnissaanilluunniit aarlerinartorsiorfiulluinnartumik piffissami aalajangersimasumi matusisoqarnissaanik peqqusisinnaapput, taamaalilluni inoqatinik atassuteqartarnerit pisariaqarfiisigut pinngitsoortinniarneqassallutik, taamaattorli § 19, imm. 2 takuuk.

Imm. 2. Imm. 1 malillugu matusinissamik peqqussut ullut arfineq-marluk tungaannut atuuttussatut nalunaarutigineqassaaq. Peqqussuteqarnissamut piumasaqaatit sulii eqqortinneqarpata peqqussutip atuunera sivitsorneqarsinnaavoq.

Imm. 3. Naalakkersuisut imm. 1 malillugu peqqussutinik nalunaaruteqarsinnaanermut pisinnaatitaaneq pillugu malittarisassanik erseqqinnerusunik, matumani sumiiffiup killilersoqqissaarneranik aalajangersaasinnaapput. Naalakkersuisut inunnut, sumiiffimmi

najugalinnut sumiiffimmiittunulluunniit, inerteqquteqarnerit pillugit malittarisassanik aalajangersaasinnaapput.

Napparsimavinnut, paaqqutarisariaqartut angerlarsimaffiinnut, najugaqarfinnut paaqqinniffiusartunut, il.il. pulaartut isersinnaanerannut killilersuinerit inerteqquteqarnerilluunniit.

§ 24. Naalackersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu, pulaartut napparsimavinnut katsorsaavinnullu, paaqqutarisariaqartut angerlarsimaffiinnut, inissianut paaqqinnittarfinnut, oqilisaaffinnut, inissiivinnut, najugaqarfissatut neqeroorutinnut assigisaannullu pisortat namminersortullu pigisaannut isersinnaanerannik killilersuinerimut, inerteqquteqarnerimut, taakkununggalu immikkut ilaatinneqartussaangitsut pillugit nuna tamakkerlugu nunalluunniit ilaanut malittarisassanik aalajangersaasinnaapput. Oqaaseqatigiit siulliit malillugit killilersuinerit inerteqquteqarnerillu nappaatinut inunnut nalinginnaasumik ulorianartunut aamma aalajangersarneqarsinnaapput, § 19, imm. 2 takuuk.

Imm. 2. Malittarisassat imm. 1 naapertorlugu aalajangersarneqartut malittarisassanik inatsisimmi allami aalajangersarneqartunik imaluunniit inatsit alla naapertorlugu aalajangersarneqartunik sanioqqutsisinnaapput.

Pisortat ingerlatsiviinik, inissiiviinik assigisaannillu atuisinnaanermut taakkununggaluunniit isersinnaanermut killilersuinerit inerteqquteqarnerluunniit

§ 25. Naalackersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu pisortat ingerlatsiviinut, inissiiviinut assigisaannullu isersinnaanermik inerteqquteqarnerimut killilersuinerimulluunniit, nuna tamakkerlugu nunalluunniit ilaanut piffissami aalajangersimasumi malittarisassanik aalajangersaasinnaapput. Imm. 1 malillugu killilersuinerit inerteqquteqarnerillu nappaatinut inunnut nalinginnaasumik ulorianartunut aamma aalajangersarneqarsinnaapput, § 19, imm. 2 takuuk.

Imm. 2. Malittarisassat imm. 1 naapertorlugu aalajangersarneqartut malittarisassanik inatsisimmi allami aalajangersarneqartunik imaluunniit inatsit alla naapertorlugu aalajangersarneqartunik sanioqqutsisinnaapput.

Ulluunerani paaqqinnittarfinnik, atuarfinnik ilinniarfeqarfinnillu allanik atuisinnaanermik taakkununggaluunniit isersinnaanermut killilersuinerit inerteqquteqarnerluunniit

§ 26. Naalackersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu pisortat namminersortullu ulloq unnuarlu paaqqinnittarfiinik, atuarfinnik ilinniarfeqarfinnillu allanik atuinermut taakkununggaluunniit isersinnaanermut killilersuinerimut inerteqquteqarnerimulluunniit, nuna tamakkerlugu nunalluunniit ilaanut piffissami aalajangersimasumi malittarisassanik aalajangersaasinnaapput. Imm. 1 malillugu

killilersuinerit inerteqquteqarnerillu nappaatinut inunnut nalinginnaasumik ulorianartunut aamma aalajangersarneqarsinnaapput, § 19, imm. 2 takuuk.

Imm. 2. Naalackersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu ilinniarfeqarfimmik aalajangersimasumik, imm. 1-imi ilaatinneqanngitsumik atuisinnaanermut tassungaluunniit isersinnaanermut killilersuinerimik inerteqquteqarnermilluunniit, piffissami aalajangersimasumi malittarisassanik aalajangersaasinnaapput.

Imm. 3. Naalackersuisut pisuni imm. 1-imi aamma 2-mi pineqartuni immikkut ittumik iliuseqarnissamut malittarisassanik aalajangersaasinnaapput, tassunga ilanngullugit pisariaqavissumik paarsisoqarnissaq, pisariaqavissumik atuartitsinissaq, uppernarsaatit, misilitsinnerit, soraarummeernerit, ilitersuisarnerit tigusisarnerillu, ikiorsiissutit, akiliuteqartarnerit, tapiissutit il.il. pillugit malittarisassat.

Imm. 4. Malittarisassat imm. 1 - 3 tunngavigalugit aalajangersarneqartut inatsimmik allamik saneqqutsisinnaapput.

Tamanik angallassissutinut isersinnaanermut killilersuinerit inerteqquteqarnerillu

§ 27. Naalackersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu angallassissutinut isersinnaanermik killilersuinerimut inerteqquteqarnermilluunniit malittarisassanik, tassunga ilanngullugu ilaasut amerlanerpaaffissaat pillugit, nuna tamakkerlugu nunalluunniit ilaanut piffissami aalajangersimasumi malittarisassanik aalajangersaasinnaapput.

Imm. 2. Malittarisassat imm. 1 naapertorlugu aalajangersarneqartut inatsimmik allamik saneqqutsisinnaapput.

Ininik piffinnillu allanik, inuit inatsisitigullu pisinnaatitaasut pisussaatitaasullu allat oqartussaaffigisaannik aamma tamanit iserfigineqarsinnaasunik atuisinnaanermik taakkunangaluunniit isersinnaanermik killilersuinerit inerteqquteqarnerluunniit

§ 28. Naalackersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu, napparsimmavinnut, katsorsaavinnut, angerlarsimaffinnut paaqqutarinniffiusunut, inissianut paaqqinnittarfiusunut, oqilisaaffinnut, inissiivinnut, najugaqarfissatut neqeroorutinut assigisaannullu pisortat namminersortullu pigisaannut pulaartut isersinnaanerannik killilersuinerimut, inerteqquteqarnerimut, taakkunungalu immikkut ilaatinneqartussaannngitsut pillugit nuna tamakkerlugu nunalluunniit ilaanut malittarisassanik aalajangersaasinnaapput.

Imm. 2. Malittarisassat imm. 1 naapertorlugu aalajangersarneqartut inatsimmik allamik saneqqutsisinnaapput.

Inini tamanit iserfigineqarsinnaasuni nammineq atortunik illersuutinillu tunillaassuunnaveersaatiniq atuineq

§ 29. Naalackersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu nammineq atortunik tunillaassuunnaveersaatinik atuinissamut malittarisassanik, tassunga ilanngullugu inini tamanit iserfigineqarsinnaasuni nammineq atortunut tunillaassuunnaveersaatinut piunasaqaatit pillugit malittarisassanik, nuna tamakkerlugu nunalluunniit ilaanut, piffissami aalajangersimasumi malittarisassanik aalajangersaasinnaapput.

§ 30. Kapitali manna malillugu inerteqquteqarneq peqqussuteqarnerlu pillugit malittarisassat maleruarneqarnissaat qulakkeerniarlugu malittarisassat atuuttut naapertorlugit politiit pissaanermik pisarialimmik atuisinnaapput.

Kapitali 5

Nappaatit tunillaassortut nunamut maanga eqqunneqarneranni iliuusissat

§ 31. Umiarsuarmi inunnik, nappaammik inunnut nalinginnaasumik uloriarnartumik imaluunniit inuiaqatigiinnut aarlerinartorsiortitsisumik napparsimasunik imaluunniit nappaammik taama ittumik tunillatsissimasorisanik ilaasoqarpat imaluunniit umiarsuarmi pissutsit allat tunillaassuunnerup siaruarnissaanut aarlerinartorsiortitsippata, umiarsuup Kalaallit Nunaannut tikinnerani aquttup umiarsuarmilu nakorsaqaarpat nakorsap umiarsualivimmi oqartussat aqutugalugit Nunatta Nakorsaaneqarfia nalunaarfigissavaat.

Imm. 2. Nunatta Nakorsaaneqarfiata umiarsuarmik ingerlatsisoq aamma umiarsuarmi nakorsaqaarpat paasissutissanik tunillaassuunnerup siaruarnissaanut aarlerinartorsiortitsinissamut pingaarutilinnik piunaffigisinnaavaa tunniusseqqullugu.

Imm. 3. Naalackersuisut Nunatta Nakorsaaneqarfia siunnersueqatigereerlugu paasissutissat sorliit imm. 1 naapertorlugu nalunaarutigineqassanersut qanorlu nalunaarutigineqassanersut pillugit malittarisassanik erseqqinnerusunik aalajangersaasinnaapput.

Imm. 4. Naalackersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu umiarsuit, nunanit aalajangersimasunit tikittut imaluunniit aalajangersimasumik ingerlaarfillit kiisalu ilisimasortat angallataat, angallatit aalisariutit angallatillu mikinerusut imm. 1 malillugu nalunaartussaataaerermik saneqqussisinaanerat pillugu malittarisassanik aalajangersaasinnaapput.

§ 32. Timmisartumi inunnik, nappaammik inunnut nalinginnaasumik uloriarnartumik imaluunniit inuiaqatigiinnut aarlerinartorsiortitsisumik napparsimasunik imaluunniit nappaammik taama ittumik tunillatsissimasorisanik ilaasoqarpat imaluunniit timmisartumi pissutsit allat tunillaassuunnerup siaruarnissaanut aarlerinartorsiortitsippata, timmisartup Kalaallit Nunaannut tikinnissaa sioqqullugu aquttup imaluunniit taassuma piginnaatitaata Nunatta Nakorsaaneqarfia nalunaarfigissavaat.

Imm. 2. Nunatta Nakorsaaneqarfiata timmisartumik ingerlatsisoq taassumaluunniit piginnaatitaa imm. 1 malillugu paasissutissanik nalunaarutiginninnermut pingaarutilinnik piunaffigisinnaavaa tunniusseqqullugu.

Imm. 3. Naalakkersuisut Nunatta Nakorsaaneqarfia siunnersueqatigereerlugu paasissutissat sorliit imm. 1 naapertorlugu nalunaarutigineqassanersut qanorlu nalunaarutigineqassanersut pillugit malittarisassanik erseqqinnerusunik aalajangersaasinnaapput.

Imm. 4. Naalakkersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu timmisartut, nunanit aalajangersimasunit tikittut imaluunniit aalajangersimasumik ingerlaarfillit imm. 1 malillugu nalunaartussaataaneramik saneqqussisinnaanerak pillugu malittarisassanik aalajangersaasinnaapput.

§ 33. Umiarsuarmi timmisartumiluunniit inunnik, nappaammik inunnet nalinginnaasumik uloriarnartumik imaluunniit inuiaqatigiinnut aarlerinartorsiortitsisumik napparsimasunik imaluunniit nappaammik taama ittumik tunillatsissimasorisanik ilaasoqarpat imaluunniit timmisartumi pissutsit allat tunillaassuunnerup siaruarnissaanut aarlerinartorsiortitsippata, Nunatta Nakorsaaneqarfia naapeqateqarsinnaanerup akuerineqarneranik nalunaartinnagu nunami inunnik naapeqateqartoqaqqusaanngilaq, taamaattorli takuuk § 37, imm. 1.

Imm. 2. Nakorsaaneqarfiup imm. 1 malillugu nunami imaluunniit timmisartoqarfiup avataani imaluunniit angallassissutip tikittarfiani, ikiartortarfiup aallartarfiullu avataani inunnik killeqanngitsumik naapeqateqarsinnaanerup akuerineqarneranik nalunaarnissamut piunasaqaatitut ukua aalajangersarsinnaavai:

- 1) ilaasut angallammilu inuttat misissortissasut,
- 2) ilaasut angallammilu inuttat misissortinnermit inernerup takkunnissaata tungaanut mattusimassasut, imaluunniit
- 3) pisariaqarpat pineqartoq napparsimmavimmut imminut unitsilluni misissugaritissasoq.

Imm. 3. Imm. 1 malillugu umiarsuarmik timmisartumilluunniit atuisinnaasup umiarsuarmut timmisartumulluunniit inuit akuersissuteqaqqaaratik iserpata akisussaasup tassannga toqqaannartumik aningaasartuutit akilissavai, peqatigisinnaaneranut akuersissummik tunniussisoqannginnerani.

Imm. 4. Maleruagassat atuuttut naapertorlugit politiit imm. 1-ip aamma 2-p malinneqarnissaat qulakkeerniarlugu piunaffigineqarnermikkut ikiuutissapput.

Imm. 5. Naalakkersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu umiarsuarmi timmisartumiluunniit nunami allami umiarsualivimmit imaluunniit Danmarkimi Savalimmiuniluunniit umiarsualivimmit tikittuni ilaasut, nunami inunnik imaluunniit timmisartoqarfiup avataani imaluunniit angallassissutip tikittarfiani, ikiartortarfiup aallartarfiullu avataani naapeqateqqaqqusaannginnerannut malittarisassanik aalajangersaasinnaapput.

§ 34. Naalakkersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu malittarisassanik aalajangersaasinnaapput, inuit nunanit sumiiffinniilluunniit aalajangersimasunit tikittut aamma nappaammik inuiaqatigiinnut aarlerinartorsiortitsisumik tunillatsissimasorisat, nunamut angalannginnermi imaluunniit nunamut tikinnermut atatillugu:

- 1) nappaammik erseqqinnerusumik aalajangersarneqartumik, inuiaqatigiinnut aarlerinartorsiortitsisumik nappaateqannginnermut uppernarsaammik nassiussissasut takutitsissasulluunniit,
- 2) nappaammik erseqqinnerusumik aalajangersarneqartumik, inuiaqatigiinnut aarlerinartorsiortitsisumik nappaateqannginnermut uppernarsaammik nassiussissasut takutitsissasulluunniit,
- 3) nappaammik inuiaqatigiinnut aarlerinartorsiortitsisumik napparsimanerlutik misissortissasut,
- 4) misissortinnermit inernerup takkunnissaata tungaanut mattusimassasut, imaluunniit
- 5) pisariaqarpat pineqartoq napparsimmavimmut imminut unitsilluni misissugaritissasoq.

§ 35. Naalakkersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu nappaammik inunnut nalinginnaasumik ulorianartumik inuiaqatigiinnulluunniit aarlerinartorsiortitsisumik eqqussisoqarnissaa siaruaattoqarnissaalu pinaveersaartinniarlugit usinut, nassatanut allakkanullu iliuutsit sorliit aallartinneqassanersut pillugit malittarisassanik aalajangersaasinnaapput.

§ 36. Naalakkersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu teriarsuit, kikkaasut imaluunniit tunillannartullit allat nappaammik inuiaqatigiinnut aarlerinartorsiortitsisumik nunamut nunamiilluunniit tunillaanissaat pinngitsoortinniarlugu iliuutsit suut aallartinneqassanersut pillugit malittarisassanik aalajangersaasinnaapput. Naalakkersuisut tamatumani umiarsualivinni aamma timmisartoqarfinni oqartussat uumasupiluiaasartunik assigisaannilluunniit erseqqinnerusumik aalajangersarneqartunik iliuuseqartitsisinnaanerannik aalajangersaasinnaapput.

Imm. 2. Naalakkersuisut teriarsuarnik imaluunniit kikkaasunik tunillannartullinnillu allanik nungusaanermut misissuinernullu aningaasartuutit umiarsuarmik timmisartulluunniit atuisuutitaasunit akilerneqarnissaat pillugit malittarisassanik aalajangersaasinnaapput.

§ 37. Umiarsuarmik timmisartumilluunniit atuisuutitaasut Nunatta Nakorsaaneqarfiata naliliinera malillugu napparsimasunik timinilluunniit toqungasunik niusiartuinnarlutik tulaassisut imaluunniit mittarfimmut mitsiartumik piginnittup Inatsisartut inatsisaat tunngavigalugu iliuutsinut aningaasartuutaasinnaasut akilissavaat, nakorsap misissuineranut inuullu misissorneqartup peqqissusiata qanoq issusianik pisariaqartumik misissuineranut tapertaasunut allanut aningaasartuutit taamaallaat pinnagit. Aalajangersagaq nappaatinut inunnut nalinginnaasumik ulorianartunut inuiaqatigiinnullu aarlerinartorsiortitsisunut atuuppoq.

Imm. 2. Imm. 1-imi taaneqartunik pisoqartillugu napparsimasut katsorsarneqarnerinut paaqqutarineqarnerinullu kiisalu toqusut ilineqarnerinut, toqusut timaannik ikuaalanermut imaluunniit ilisiffissamut assartuineranut aningaasartuutit umiarsuarmik timmisartumilluunniit atuisuutitaasup akilissavai. Inuilli Kalaallit Nunaanni najugalittut nalunaarsorneqarsimasut inunnut Kalaallit Nunaanni aalajangersimasumik najugalittut malittarisassanut atuuttunut ilaapput.

Imm. 3. Aqquissaaruttoornermi iliutsinut Inatsisartut inatsisaat naapertorlugu aallartinneqartunut aningaasartuutit sapinngisamik usit ingerlaqqinngitsoortut nalinginit matussuserneqartassapput.

Imm. 4. Imm. 1 malillugu umiarsuarmik timmisartumilluunniit atuisinnaasup umiarsuarmut timmisartumulluunniit imm. 1 naapertorlugu Nunatta Nakorsaaneqarfianit akuersissuteqaqqaaratik inuit iserpata akisussaasup tassanga toqqaannartumik aningaasartuutit akilissavai peqatigisinnaaneranut akuersissummik tunniussisoqannginnerani.

Kapitali 6

Tunillaassunnerup iliuseqarfiginissaa, timimik toqungasumik pilattaalluni misissuinissaq il.il. siunertaralugit iliussissat

§ 38. Naalackersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu tunillannartumik nappaammit tunillaassortuminngaanneersumik, Inatsisartut inatsisaanni matumani pineqartumik eqqussineq, niueruteqarneq, suliarinnineq, toqqorsineq annissinerlu pillugit malittarisassanik aalajangersaasinnaapput.

§ 39. Naalackersuisut Nunatta Nakorsaaneqarfia siunnersueqatigereerlugu siunertat § 1-imi taaneqartut isumagineqarnissaannut tunngatillugu timinik toqungasunik nappaammik inunnut nalinginnaasumik ulorianartumik inuiaqatigiinnulluunniit aarlerinartorsiortitsisumik tunillatsissimasumik eqqussineq annissinerlu kiisalu taakku nunami maani suliarineqarnerat assartornerilu pillugit malittarisassanik erseqqinnerusunik aalajangersaasinnaapput.

§ 40. Nunatta Nakorsaaneqarfia toqusoqarnerani nappaammik inunnut nalinginnaasumik ulorianartumik inuiaqatigiinnulluunniit aarlerinartorsiortitsisumik toqquteqartoqarnera pasitsaanneqarpat paasineqarpalluunniit, timimik toqungasumik pilattaanikkut pisariaqartutut misissuisoqarnissaanik peqqusisinnaavoq:

- 1) toqqutaata nappaammik nalinginnaasumik inunnut navianartumik inuiaqatigiinnulluunniit aarlerinartorsiortitsinera qularnaatsumik aalajangerniarlugu, imaluunniit
- 2) nappaatip nalinginnaasup inuiaqatigiinnulluunniit aarlerinartorsiortitsisup ingerlarnga, ineriartornera, pissusaa, ilisarnaataa ersiutaaluunniit pillugit ilisimasanik pingaarutilinnik pissarsiniarnermi.

Imm. 2. Nunatta Nakorsaaneqarfia sapinngisamik piaarnerpaamik timimillu toqungasumik pilattaalluni misissuisoqartinnagu, toqusup qaniginerpaasaanut toqungasup timaanik pilattaalluni misissuisoqartussaanaera pillugu ilisimatitsissaaq.

§ 41. Nunatta Nakorsaaneqarfia tuniluuttup suussusia, pilerfia siammaassimassusialu qularnaatsumik paasiniarlugu iliuserisassatut pisariaqartutut nappaammik tunillaassortitsisumik uumasuaqqanik tappiorannartoqarneranik taakkuluunniit assigisaannik misissuinernik aallartitsisinnaavoq.

§ 42. Suliffeqarfiup inuussutissanik nioqqutissiorneratigut nioqqutissiaminillu siammarterineratigut nappaammik inunnut nalinginnaasumik ulorianartumik inuiaqatigiinnulluunniit aarlerinartorsiortitsisumik tunillaassuunnerup siammaanneqarnissaa aarlerinaateqarpat, tunillaassuunnerup unitsinnissaa siunertaralugu pisariaqarpat, Naalackersuisut Tunillaassortunik Nappaalanersuaqarneranut Ataatsimiititaliarsuaq siunnersueqatigereerlugu, suliffeqarfik pineqartoq tamakkiisumik ilaannakortumilluunniit matuneqarnissaanik peqqussuteqarniarlutik imaluunniit inuup tunillannartumik timimiullip suliffeqarfimmuut isernissaanik inerteqquteqarniarlutik aalajangersinnaapput.

Kapitali 7

Paasisutissiisussaatitaanerit aamma nappaatit tunillaassortut il.il. siaruannerannik paasiniaanermut nakkutilliinermullu atatillugu inuit pillugit paasisutissanik suliarineqartarnek

Inunnut inatsisitigullu pisinnaatitaasunut pisussaatitaasunullu paasisutissiisarnissamut pisussaaffeqarnek

§ 43. Inuit Nunatta Nakorsaaneqarfianit qinnuigineqarnermikkut inuit pillugit paasisutissanik attuumassutilinnik, tassunga ilanngullugit nunami nunaniluunniit allani najugaqarfigisimasatik pillugit paasisutissanik kiisalu inuit qanimut naapissimasami attaveqarfissatut paasisutissaannik kiisalu atinik tunniussinissamik pisussaaffeqarput. Nunatta Nakorsaaneqarfia nappaatip inunnut nalinginnaasumik ulorianartup inuiaqatigiinnulluunniit aarlerinartorsiortitsisup siaruatsaaliniarneranut tunillaassornissaatalu pinaveersaartinnissaanut aatsaat pisariaqarpat, oqaaseqatigiit suilliit malillugit paasisutissanik qinnuiginninnaapput.

Imm. 2. Peqqissaanermik suliaqartut napparsimasumik Nunatta Nakorsaaneqarfiata Inatsisartut inatsisaanni kapitali 3 naapertorlugu iliuuseqartoqarnissaanik aalajangernissaanut attuumassuteqarsinnaasutut nalilersoqqissaarneqartumik immikkut ittumik aarlerinartumik pissusilersortumik ilisimannilerunik, inuit pillugit paasisutissanik attuumassutilinnik Nunatta Nakorsaaneqarfianut ingerlatitseqqissallutik pisussaatitaapput, tassunga ilanngullugit peqqissuseq pillugu paasisutissat aamma pissusilersorneq pillugu paasisutissat.

Imm. 3. Nunatta Nakorsaaneqarfiata Inatsisartut inatsisaanni kapitali 3 naapertorlugu iliuutsinik aalajangiinissaanut napparsimasut pillugit nalunaarsuiffinit il.il. aamma isumassuineq pillugu nalunaarsuiffinit paasisutissat pisariaqarpata, oqartussat, paaqqinnittarfiit peqqissaanermillu suliaqartut Nunatta Nakorsaaneqarfianit qinnuigineqarnermikkut paasisutissanik taakkunannga ingerlatitseqqinnissamik aamma pisussaatitaapput.

Imm. 4. Inatsisitigut pisinnaatitaasut pisussaatitaasullu Nunatta Nakorsaaneqarfianit qinnuigineqarnermikkut sulisut, ilaasortat, pulaartut il.il. attaveqarfissatut paasisutissaannik kiisalu ingerlaarfii pillugit paasisutissanik attuumassutilinnik tunniussissallutik pisussaatitaapput. Nunatta Nakorsaaneqarfia nappaatip inunnut nalinginnaasumik ulorianartup inuiaqatigiinnulluunniit aarlerinartorsiortitsisup siaruarnissaata tunillaassuunnissaatalu

pinaveersaartinnissaannut pisariaqarpat imm. 1 malillugu paasissutissanik kisimi qinnuiginnissinnaavoq. Nunatta Nakorsaaneqarfia taamaallaat inuit pillugit paasissutissat taama ittut pigineqarpata taakkunanga qinnuiginnissinnaavoq.

§ 44. Inuk ilaasoq nappaammik inunnt nalinginnaasumik ulorianartumik inuiaqatigiinnulluunniit aarlerinartorsiortitsisumik napparsimappat imaluunniit nappaammik taama ittumik tunillatsissimasorineqarpat, Nunatta Nakorsaaneqarfianit qinnuiginnittoqarneratigut ilaasut allattorsimaffianik paasissutissat inuttallu pillugit paasissutissat pigineqarpata, paasissutissat taakkua timmisartumut umiarsuarmulluunniit akisussaasuusup imaluunniit taassuma piginnaatitaata tunniutissavai.

Imm. 2. Naalackersuisut imm. 1 naapertorlugu paasissutissat suut taakkulu qanoq tunniunneqarnissaat pillugit malittarisassanik erseqqinnerusunik aalajangersaasinnaapput.

Nappaatinut tunillaassortunut tunngatillugu nalunaaruteqartarnermik aqqissuussaq

§ 45. Naalackersuisut peqqissaanermik suliaqartut akuerisat inuillu imaluunniit suliffeqarfiit, laboratoriami misissueqqissaanermik ingerlatsisut inuit pillugit paasissutissanik, nappaatinut tunillaassortunut, Inatsisartut inatsisaanni § 2-mi pineqartunut tunngassutilinnik Nunatta Nakorsaaneqarfianut ingerlatitseqqinnissamik akisussaaffeqarnerat pillugu malittarisassanik aalajangersaasinnaapput.

Imm. 2. Naalackersuisut peqqissaanermik suliaqartut akuerisat inuillu imaluunniit suliffeqarfiit, sumiiffimmi allami laboratoriami misissueqqissaanermik ingerlatsisut, misissuinermit atortunik, imaluunniit virusit geniinik misissueqqissaanermik (helgenomsekventering) imaluunniit misissuinermit atortunik misissueqqissaanernit assingusunit inernernik, inuup nappaammik Inatsisartut inatsisaanni § 2-mi pineqartumik napparsimaneranik takutitsisunik Nunatta Nakorsaaneqarfianut ingerlatitseqqinnissaannut malittarisassanik aalajangersaasinnaapput.

Oqartussat akornanni inuit pillugit paasissutissanik paarlaasseqatigiinneq

§ 46. Nunatta Nakorsaaneqarfia tuniluunnerup paasiniarneqartarnera pillugu Statens Serum Institutimik oqartussanillu allanik attuumassuteqarsinnaasunik isumaqatigiissusiorsinnaavoq. Nunatta Nakorsaaneqarfia inuit nappaammik § 2-mi pineqartumik tunillatsissimasut tunillatsinnerisa paasiniarnissaanut atatillugu inuit pillugit paasissutissanik suliaqassaaq tiguisarlunilu imaluunniit ingerlatseqqillugit, inuit pillugit paasissutissat tullinnguuttumi allassimasut:

- 1) inuup normua imaluunniit paasissutissat allat kinaassutsimut tunngasut.
- 2) Tunillaassuunnerup pilerfiatut ilimagineqartoq.
- 3) Tunillatsissimasup nunami allamiiffigisaa.
- 4) Tunillatsissimasup timmisartumik angalaneri.
- 5) Tunillatsissimasup ilisimatitsissutigisaatut qanimut attaveqarfigisimasat amerlassusaat.

Imm. 2. Nunatta Nakorsaaneqarfiata imm. 1 malillugu paasissutissat, Statens Serum Institutip nappaatinik tunillaassortunik, Inatsisartut inatsisaanni § 2-mi pineqartunik pinaveersaartitsinermut akiuiniarnermullu sulianik isumaginninneranut pisariaqarpata taamaallaat tunniutissavai.

§ 47. Nunatta Nakorsaaneqarfiata inuit pillugit paasissutissat pisariallit, tassunga ilanngullugit peqqissuseq pillugu paasissutissat, Nunatta Nakorsaaneqarfiata kommunimi pineqartumi innuttaasut kapitali 3 malillugu iliuutsinut kajumissutsiminnik suleqataanissaannik kajumissaarineranik kommunalbestyrelsip ikiuunnissaa siuertaralugu pisariaqarpat sumiiffimmi kommunalbestyrelsimut taamaallaat ingerlateqqissinnaavai.

Imm. 2. Sumiiffimmi kommunalbestyrelsip inuit pillugit paasissutissat, tassunga ilanngullugit peqqissuseq pillugu paasissutissat Nunatta Nakorsaaneqarfianit qinnuiginnittoqarneratigut ingerlateqqissavai. Nunatta Nakorsaaneqarfia oqaaseqatigiit siulliit malillugit paasissutissanik taamaallaat qinnuiginnissinnaavoq, Nunatta Nakorsaaneqarfia tuniluunnerup paasiniarneranik suliaqarneranut atugassatut imaluunniit Nunatta Nakorsaaneqarfiata Inatsisartut inatsisaanni kapitali 3 malillugu iliuusissanik aalajangernissaanut atugassatut pisariaqarpata.

§ 48. Nunatta Nakorsaaneqarfiata ateq paasissutissallu inuup nappaammik inunnut nalinginnaasumik ulorianartumik inuiaqatigiinnulluunniit aarlerinartorsiortitsisumik tunillatsissimaneranut tunngasut, pisortat namminersortulluunniit suliffeqarfiannut, tunillatsissimasup najugarisaanut orniguffigisartagaanulluunniit, suliffeqarfiimmi tassani tunillatsissimasumik paasisaqartoqarpat, suliffeqarfiullu nappaammik inunnut nalinginnaasumik ulorianartumik inuiaqatigiinnulluunniit aarlerinartorsiortitsisumik siaruatsaaliuinissamut tunillatsittoqarnissaanillu pinaveersaartitsinissamut iliuusissanik pisarialinnik aalajangiinissaanut pisariaqarpata ingerlateqqissinnaavai.

Inuit pillugit paasissutissanik suliaqarnermut tunngatillugu piginnaatitsinissamut aalajangersagaq

§ 49. Naalakkersuisut nappaatip inunnut nalinginnaasumik ulorianartup erseqqinnerusumik aalajangersarneqartup inuiaqatigiinnulluunniit aarlerinartorsiortitsisup, Inatsisartut inatsisaanni § 2-mi pineqartut siaruarnissaasa pinaveersaartinnissaannut inuit pillugit paasissutissat suliarinissaat pisariaqarpat, suliarineqarsinnaanerannut malittarisassanik aalajangersaasinnaapput.

Imm. 2. Malittarisassat imm. 1 naapertorlugu aalajangersarneqartut inuit pillugit paasissutissanik suliarinninnermut malittarisassanik inatsimmi allami aalajangersarneqartunik inatsilluunniit alla naapertorlugu aalajangersarneqartunik saneqqutsisinnaapput.

Kapitali 8

Pisortat pisussaaffimminnik saneqqutsinerat aamma inatsisit allat naapertorlugit inuit pisinnaatitaaffii kiisalu pilersuineramik qulakkeerinnineq

§ 50. Naalakkersuisut nappaatip inuiaqatigiinnut aarlerinartorsiortitsisup kingunerisaanik inunnik tassangaannartumik katsorsartariaqartunik imaluunniit katsorsarneqarnissamik pisariaqartitsivissortunik katsorsaanssamut paaqqinninnissamullu isumalluutit naammannissaannik qulakkeerinninnissamut pisariaqarpat, pisortat tamanut pisussaaffiink aamma innuttaasut pisinnaatitaaffiink, inatsimmi allami, inatsit alla naapertorlugu imaluunniit inatsit alla naapertorlugu pisortanit aalajangiinerit naapertorlugit aalajangersarneqartunik saneqqussisinaanermut nuna tamakkerlugu nunalluunniit ilaanut piffissami aalajangersimasumi malittarisassanik aalajangersaasinnaapput.

Imm. 2. Naalakkersuisut piumasaqaatinik inatsimmi allami imaluunniit inatsit alla naapertorlugu aalajangersarneqartunik saneqqussinissaq napparsimasut innuttaasullu katsorsarnissaasa, paaqqutarinissaasa inatsimmi ilu imaluunniit inatsit naapertorlugu pisinnaatitaaffiisa allat il.il. qulakkeernissaannut pisariaqarpat, piumasaqaatillu malittarisassat imm. 1 naapertorlugu aalajangersarneqartut kingunerisaannik naammassineqarsinnaangippata, saneqqussisinaanermik nuna tamakkerlugu nunalluunniit ilaanut, piffissami aalajangersimasumi malittarisassanik aalajangersaasinnaapput.

Imm. 3. Pisinnaatitaaffiit pisussaataitaaffiillu kiisalu piumasaqaatit pineqartut saneqqunneqarnissaannut tunngavissaaruppat, malittarisassat imm. 1 aamma 2 naapertorlugit atuutilersinneqartut atorunnaarsinneqassapput.

§ 51. Naalakkersuisut nappaatinut inuiaqatigiinnut aarlerinartorsiortitsisunut iliutsit Inatsisartut inatsisaat manna naapertorlugu aalajangerneqartut kingunerisaannik pisussaaffinnik pisinnaatitaaffinnillu, inatsimmi allami, inatsit alla naapertorlugu imaluunniit inatsit alla naapertorlugu pisortanit aalajangiinerit naapertorlugit aalajangersarneqartunik eqqortitsinissaq ajornarsippat imaluunniit ajornakusuulterpat, pisortat namminersortullu pisussaaffiinit pisinnaatitaaffiinnullu pisussaaffinnik saneqqussisinaanermik nuna tamakkerlugu nunalluunniit ilaanut, piffissami aalajangersimasumi malittarisassanik aalajangersaasinnaapput.

Imm. 2. Pisinnaatitaaffiit pisussaaffiillu pineqartut saneqqunneqarnissaannut tunngavissaaruppat, malittarisassat imm. 1 naapertorlugu atuutilersinneqartut atorunnaarsinneqassapput.

§ 52. Naalakkersuisut nunami nappaammik inuiaqatigiinnut aarlerinartorsiortitsisumik siaruaattoqarnerani siaruartoqarnissaanillu uloriarnartorsiortoqarnerani, nioqqutissanik pilersuineq qulakkeerniarlugu iliutsinik immikkut ittunik nuna tamakkerlugu nunalluunniit ilaanut, piffissami aalajangersimasumi malittarisassanik aalajangersaasinnaapput.

Imm. 2. Malittarisassat imm. 1 naapertorlugu aalajangersarneqartut inatsimmik allamik saneqqutsisinnaapput.

Kapitali 9

Piginnaatitsinermik aalajangersakkanik Inatsisartut nakkutiginninnerat

§ 53. Naalakkersuisut taamaallaat § 2, imm. 6, § 20, imm. 1 aamma §§ 22, 24-29, § 34 aamma naapertorlugit malittarisassanik aalajangersaasinnaapput, malittarisassat imarisaat Tunillaassortunik Nappaalanersuaqarneranut Ataatsimiititaliarsuarmit inassuteqartoqarneratigut Inatsisartut ataatsimiititaliamik pilersitaannut saqqummiunneqareersimappata aamma ataatsimiititaliaq malittarisassat atuutilersinneqarnissaannut akerliunerarsimangippata, taamaattorli imm. 2 aamma 3 takukkit.

Imm. 2. Imm. 1-imi oqaaseqatigiinni siullerni malittarisassanik aalajangersariikkanik atorunnaarsitsineq, sakkukinnerulersitsineq annikitsumillu allannguinerit pineqangillat.

Imm. 3. Inuiaqatigiit peqqissusaannut aarlerinarluinnartumik pilertortumillu ulorianartorsiortitsisoqarpat navianartorsiortitsisoqarpalluunniit Naalakkersuisut imm. 1 malillugu ataatsimiititaliamut saqqummiusseqqaanngikkaluarlutik malittarisassat atuutilersissinnaavaat. Taamaattoqassappat Naalakkersuisut malittarisassat atuutilersinnerisa kingorna pisariaqanngitsumik kinguartitsinertaqanngitsumik ataatsimiititaliamut malittarisassat saqqummiutissavaat. Ataatsimiititaliaq tamatuma kingorna malittarisassanut akerliuppat Naalakkersuisut malittarisassat atorunnaarsissavaat.

Imm. 4 Naalakkersuisut ataatsimiititaliap malittarisassanut akerliunermik kingusinnerpaamik qaqugu nalunaaruteqarnissaanut piffissaliisinaapput.

§ 54. Nammineerluni ingerlatsinermigut qinnuigineqarnermigulluunniit Tunillaassortunik Nappaalanersuaqarneranut Ataatsimiititaliarsuarmit amerlanerussuteqartunit § 2, imm. 6, § 20, imm. 1, §§ 22, 24-29, § 34 naapertorlugit malittarisassanik aalajangersaasoqassasoq imaluunniit malittarisassat aalajangersakkat taakku naapertorlugit aalajangersarneqartut atorunnaarsinneqassasut sakkukillineqassasulluunniit inassutigineqarpata, Naalakkersuisullu inassutigineqartumik malinnikkusunngippata, Naalakkersuisut ataatsimiititaliap inassutaa pillugu taannalu Naalakkersuisunit malinneqarusunnginnera pillugit Inatsisartut tamatumunnga ataatsimiititaliaannut sapinngisamik sukkanerpaamik ilisimatitsissapput.

Imm. 2. Imm. 1-imi malittarisassanik aalajangersariikkanik annertuumik allannguinerit pineqangillat.

§ 55. Naalakkersuisut Tunillaassortunik Nappaalanersuaqarneranut Ataatsimiititaliarsuup § 2, imm. 6, § 20, imm. 1, §§ 22, 24-29, § 34 naapertorlugit malittarisassanik aalajangersaasoqartariaqarneranik inassutigisaanik nalunaaruteqassapput.

Imm. 2. Inatsisartut ataatsimiititaliamut pilersitaannut taakku pillugit §§ 53 aamma 54 malillugit saqqummiisoqassappat ilisimatitsisoqassappalluunniit inassuteqaat saqqummiussinerup ilisimatitsinerulluunniit kingorna sapinngisamik sukkanerpaamik nalunaarutigineqassaaq, taamaattorli imm. 3 takuuk.

Imm. 3. Innuttaasut inuiaqatigiit peqqissusaannut ulorianarsinnaasumik navianarsinnaasumilluunniit iliornissaasa pinaveersaartinnissaat pisariaqarpat § 53 malillugu inassuteqaatinik nalunaaruteqarnissaq inassuteqaammi malittarisassat nassuiarneqartut nalunaarutigineqarnissaasa kingornanut utaqqisinneqarsinnaavoq. Inassuteqaat tamatuma kingorna sapinngisamik sukkanerpaamik saqqummiunneqassaaq.

Kapitali 10

Pinnngitsaaliissummik taarsiissutitalimmik pigisanik piginnikkunnaarsitsineq

§ 56. Naalackersuisut Inatsisartut inatsisaat manna malillugu iliuitsit imaluunniit malittarisassat manna naapertorlugu aalajangersarneqartut naammassineqarnissaannut atugassatut pinnngitsaaliissummik taarsiissutitalimmik pigisanik arsaarinninnissaq aallartissinnaavaat.

Kapitali 11

Naammagittaalliorneq aamma eqqartuussivinnut suliaassanngortitsineq

§ 57. Inatsisartut inatsisaat naapertorlugu iliuseqartoqartillugu, iliuitsillu kiffaangissusiiiaanermik ilaqarpata aamma iliuitsinik taama ittunik taamaatitsinissamik qinnuiginnittoqarneranik itigartitsinermi, oqartussat pineqartumut taassumaluunniit sinniisianut Eqqartuussisarneq pillugu inatsimmi malittarisassat malillugit eqqartuussivimmi misiliinissamut ilitersuummik tunniussissapput.

Imm. 2. Eqqartuussivinni suliaassanngortitsinissaq pillugu qinnuiginninnermik saqqummiisoqarsimappat oqartussaasut kiffaangissusiiagaanissamik imaluunniit taassuminnga atorunnaarsitsinissamik aalajangiisut piaartumik, qinnuiginninnerullu saqqummiunneqarneraniit sapinngisamik ullut arfineq-marluk qaangiutsinnagit, suliamik Kalaallit Nunaanni Eqqartuussivimmut saqqummiissapput.

Imm. 3. §§ 10 – 12 malillugit peqqusinerit, nalunaarutigineqarnerisa kingorna ullut arfineq-marluk qaangiutsinnagit, Nunatta Nakorsaaneqarfianit Kalaallit Nunaanni Eqqartuussivimmut suliaassanngortinneqassapput.

Kapitali 12

Uppernarsaatissanik ujaasineq aamma pineqaatissiissutaasinnaasut pillugit aalajangersakkat

Uppernarsaatinik ujaasineq

§ 58. Inatsisartut inatsisaanni matumani aalajangersakkanik unioqqutitsineq pillugu suliani uppernarsaatissanik ujaasineq Eqqartuussisarneq pillugu inatsimmi malittarisassat naapertorlugit pisinnaavoq.

Pineqaatissiissutit pillugit aalajangersakkat

§ 59. Pinerluttulerinermi inatsimmi pineqaatissiissutaasinnaasut malillugit uku pineqaatissinneqarsinnaapput:

- 1) peqqussutini § 9, § 10, imm. 1, § 11, imm. 1, § 12, § 13, imm. 1, § 13, imm. 1 aamma 2 kiisalu § 14, imm. 1 imaluunniit § 23, imm. 1 malillugit nalunaarutigineqartunik malinninngitsaq.
- 2) Inerteqqummik § 15, imm. 1 imaluunniit § 21, imm. 1 naapertorlugit aalajangersakkanik unioqquutitsisoqarpat.
- 3) § 31, imm. 1 aamma 2, aamma § 32, imm. 1 aamma 2 malillugit pisussaaffinnik eqquutsitsinngitsaq.
- 4) § 33, imm. 1-2 unioqquutippagu.
- 5) § 42 malillugu peqqussutini unioqquutitsisoq eqquutsitsinngitsorluunniit.
- 6) § 43 imm. 1 imaluunniit § 44 imm. 1-imi malittarisassat aalajangerneqarsimasut malillugit inassutiniq eqquutsitsinngitsoorqoq.

Imm. 2. Najoqqutassanut Inatsisartut inatsisaat naapertorlugu suliarineqartunut Pinerluttulerinermik Inatsit malillugu pineqaatissiinerit aalajangersarneqarsinnaapput.

Imm. 3. Ingerlatseqatigiiffiit il.il. (inatsisitigullu pisinnaatitaasut pisussaataasullu) Pinerluttulerinermi inatsimmi kapitali 5-imi malittarisassat malillugit pinerluuteqarsimasutut akisussaatinneqarsinnaapput.

Imm. 4. Akiliisitsinerit Inatsisartut inatsisaat una taannaluunniit naapertorlugu malittarisassat aalajangersarneqartut naapertorlugit aalajangerneqartut Nunatta Karsiata pisassarissavai.

Kapitali 13

Atuutilersitsinermut aalajangersakkat

§ 60. Inatsisartut inatsisaat 1. juli 2023-mi atuutilissaaq.

Kalaallit Nunaanni Namminersorlutik Oqartussat, ulloq xx.xxx. 2023

Naalakkersuisut Siulittaasuat